



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

**Dei Immortalis In Corpore Mortali Patientis Historia**

**Stanyhurst, Guillaume**

**Coloniæ Agrippinæ, 1694**

§. XVI. Mortitur.

[urn:nbn:de:hbz:466:1-49178](#)

entus in torculari, tu marcidus in luponari : ille inter contumelias & opprobria, tu inter plausus & gratulationes. Erras à via, qui à tam longe sequeris eum, qui est via. Oportuit Christum pati pati? imò & mori, ut intraret in gloriam suam. Et tu refugis pati, ut intres in gloriam alienam? Sed quem oportuit pati, jam est passus: superest, ut qui pro nobis voluit pati, velit & mori. Scio morieris tu, Rex sæculorum immortalis, ut vivam ego vitam immortalem. Imò jam moreris: quia ut video, inclinatum est caput, & clauduntur oculi, & riget corpus, & vita deficit. Vale mi Crea-  
tor, vale Redemptor, vale gaudium cordis mei. Tempus est ut abeas ex hoc mundo ad Patrem.

*3. Reg. 2.  
20.* Sed dum jam ab iis, positionem unam parvulam ego de-  
precor à te ; obsecro ne confundas faciem meam. Re-  
pete hæc pauca verba coram Patre post mortem,  
quæ dixisti Patri ante mortem : *Pater, quos dedisti  
Ioan. 17. mibi, volo ut ubi sum ego, & illi sint mecum.*

24.

## §. XVI.

## Moritur.

**T**Andem aliquando post diuturnam per 40. sæcula, cœli, terræque expectationem, adest dies ille expectatissimus, atque hora felicissima, omnium maxima, atque sacratissima, in qua pri-  
mum ac summum omnium mysteriorum ab orbe condito, ad infinitam usque æternitatem pera-  
ctum, & consummatum est. Dies jam adest quasi criticus, & decretorius mundi jam animam a-  
gentis, ut in statum florentissimum restauretur. Dies, & hora placabilis Domini, quâ cogitans cogitationes pacis, & non afflictionis, mundum tacitis clamoribus invocantem, cum universitate omnium creaturarum exaudivit. Stabat ad dexte-  
ram

ram crucis Misericordia cum oliva; ad sinistram  
Justitia cum romphæa, ut tandem Christi morte,  
dirempta lite, inita pace se invicem osculentur.  
Christus ergo ut vidi jam illud infiniti momen-  
ti adesse momentum, quod ab omni retro æterni-  
tate, in arcano SS. Trinitatis Concilio fuerat de-  
lectum, & præfixum, ut hominem perditum re-  
dimeret. Anno ab orbe condito quando in prin-  
cipio creavit D E U S cœlum & terram 4086. Im-  
perii Romani 81. Tiberii Augusti 20. B. Virginis  
49. Olympiade 203. orbe jam toto Patri recon-  
ciliato, debellato peccato, subacto dæmone, in-  
stitutis sacramentis omnibus, affixo jam Cruci  
chirographo decreti illius fatalis, omnibus jam  
consummatis, quæ de ipso vel præfiguraverant  
Patriarchæ, vel prædixerant Prophetæ, vel à Patre  
eius fuerat constitutum, omnibus ritè expletis ad  
Salutem mundi necessariis, æterni Patris unigeni-  
tus Filius, quem in æstimabilis charitas, & in per-  
euntes homines amor, traxit in terras, qui propter  
nos homines, & propter nostram salutem, factus  
est homo, hora à meridie tertia, in monte Calva-  
riæ, factus Patri obediens usque ad crucem, ut ei-  
dem obediret usque ad mortem Crucis, pro salute  
mundi, & humani generis redemptione, J E S U S  
Christus, incarnatus D E I Filius, inclinato capite  
tradidit spiritum. Mortuus est D E U S, & adhuc lu-  
bet vivere? Ille, cui omnia, & per quem omnes  
vivunt, desiit vivere, quis hoc audiens non moria-  
tur? Quis adhuc ducat spiritum, dum ille, ex quo,  
& in quo, & per quem omnes spirant, tradidit  
spiritum? Filius D E I expiravit, & Filius hominis  
adhuc peccabit? Nunc per omnes terrarum re-  
giones, immenso clangore, longè, lateque instar  
sonori classici, circumsonet vox illa Pauli, ut ab

B b 5

omni-

omnibus ubique gentium hominibus percipiatur : Non estis vestri : empti enim estis pretio magno. Id enim certo est certius, & vero verius : omni quod potest concipi jure, omnibus qui fingi possunt titulis, omnibus quae allegari possunt nominibus, potest nos Christus sibi tanquam suos vindicare, & cuilibet homini injectâ manu dicere,

2.Cor.6

Isa. 43.

quod Israëli dixit apud Isaiam : Meus es tu. Postquam pro te inclinato capite tradidi spiritum, jam infinitis titulis, meus es tu, jam desisti esse tuus, quia meus es tu. Ego te venditum redemi, perditum servavi, captivum liberavi, mortis reum vitâ donavi; ergo meus es tu. Merito ergo clamat Di-

vus Paulus : Non estis vestri : empti enim estis pretio magno. Non est homo qui potest concipere, sed solus Deus potest intelligere, quam sit immensa magnitudo hujus pretii. Sed ut possitis illud cæca saltem conjectura, si non certa scientia assequi; audite, & stupete. Si credimus variis Sanctorum revelationibus, Christus, ut nos redimeret, profundit sexages, & bis mille lacrymas : guttas sanguinis cum in horto sudaret, 305. supra nonagies ac septies millenas. In flagellatione sexies mille 666. ictus exceptit : alapas 110. ictus in collo 120. in capite 85. in ventre 38. in humeris 62. in brachiis 40. Empti estis pretio magno. Necdum finis. Videte quid in facie pertulerit : 32. in faciem ejus sordida sputa conjecta sunt : os illi trigesies contusum : instar canis pedibus abjectus centies septuagesies : ter decies profusus, & solo afflictus : capillis trecenties tractus, barba illi evulsa ; aut hinc inde implicata manu distracta, quinquagies octies. Empti estis pretio magno. Necdum finis pretii. In coronatione 300. vulnera à spinis impressa : ob nostra peccata, pro nostrâ salute nongenties

Pretio  
magno  
emptus  
est ho-  
mo.Barri  
blandit.  
Po. 260.

ties gemuit, & suspiravit : tormenta quæ poterant ei præsentem mortem inferre , 162. subiit: supremo in agone, quali jam moriturus, decies ac nonies fuit. A Pilati prætorio usque ad montem Calvariæ portando crucem 321. passus confecit. An non ergo *empti estis pretio magno?* Et tamen post tot debita ex parte tua, post tot beneficia ex parte Christi, nonne tibi ingrata anima meritò posset exprobrare Salvator tuus quod apud Isaiam : *Ob-lita es DEI Salvatorū tui, & fortis adjutoris non es re-cordata?* O Christe ! quid aliud jam tibi offeram pro omnibus pœnis quas passus es , nisi me pro quo passus es ? Hoc mihi jam certum , quia tu mortuus es pro me, mori mundo, mori mihi, mori omnibus quæ sunt mundi , ut tibi soli deinceps vivam, ô vita mea ! Adrepo ergo manibus, & pedibus per montem Calvariæ, ad tuam Crucem, tanquam misorum asylium ; ad te crucifixum, non jam fulmine armatum, sed plagis multis vulneratum, & exclamo contritus, & gemens : Parce mihi Domine, quia tu non pepercisti, ut parceres mihi : quia ut me sanares , vulneratus es; ut ego viverem, mortuus es ; ut ego declinarem à malo, & facerem bonum , atque ita obtinerem summum bonum, declinarem summum malum, inclinato capite tradidisti spiritum.

## §. XVII.

## Signa post mortem.

Cum inter cœli obscurati cæcas tenebras, & caliginem , solis deficiens pallorem, noctis diurnæ silentium, inter frigora, & fævientium ventorum turbines, inter hostium suorum ludibria & scommata, sexcentis cruciatibus exhaustis medio in aëre Christus spiritum Patri reddidisset,

repent-